


<https://news.usm.my>

Berita Mutakhir

29
JUL

ANAK-ANAK MUDA ASEAN PERLU BERFIKIR SECARA PROGRESIF, GESA PRO CANSELOR USM



PULAU PINANG, 28 Julai 2015 - Anak-anak muda berpendidikan tinggi sebagai pemimpin masa hadapan ASEAN digesa menjadi pemikir progresif yang mampu menyumbang idea bagi pembangunan yang lebih lestari.


Ketika membuat saranan itu, Pro Canselor Universiti Sains Malaysia (USM), Tan Sri Datuk Mustafa Mansur berkata, generasi muda yang bakal menerajui pucuk pimpinan negara-negara ASEAN pada suatu hari nanti, perlu mempunyai pemikiran termaju agar mampu berfikir dan membuat keputusan mendepani zaman mereka.

"Hal ini penting untuk memastikan akan berlakunya kesinambungan dalam program-program pertumbuhan dan pembangunan ASEAN yang telah dirancang dalam usaha mengekalkan kesatuan ASEAN," katanya.



Beliau berucap pada 3rd ASEAN Future Leaders Summit (AFLES 2015) anjuran Persatuan Pelajar Ijazah Tinggi USM dengan kerjasama Akademi Kepimpinan Pengajian Tinggi (AKEPT), Universiti Teknologi MARA (UiTM) dan Prince of Songkla University (PSU) Thailand di sini, hari ini.

Mustafa berkata, pucuk pimpinan juga perlu memiliki integriti yang tinggi, tadbir urus yang baik serta tanggungjawab moral sebagai matlamat utama dan bukan sekadar memimpin sahaja, tetapi berupaya membawa komuniti ke arah kehidupan yang lebih bermakna.




"Jadilah pemimpin yang dapat mengubah dan mewujudkan masa hadapan yang lebih baik di samping bekerja ke arah mewujudkan persekitaran yang dapat membangunkan komuniti ASEAN yang lestari, dinamik, bersatu dan berdaya saing," katanya lagi.

Beliau mengingatkan para peserta yang hadir tentang kepelbagaian yang ada pada mereka merupakan aset yang paling berharga dan unik yang perlu dipupuk untuk mengekalkan keharmonian rantau ini, dengan diperkukuh menerusi ilmu dan pendidikan tinggi.

Tambah beliau, ini juga bermakna generasi muda perlu mahir dan memanfaatkan sebaik-baiknya ilmu dan teknologi canggih yang ada serta menggunakan kemahiran dan teknologi itu demi kebaikan dan kesejahteraan masyarakat sejagat.

Sidang kemuncak yang berlangsung selama 10 hari sejak 24 Julai lalu membawa para pemimpin pelajar dari 10 negara ASEAN seramai 160 orang ke empat lokasi bermula di AKEPT, UiTM, USM dan berakhir di PSU Thailand pada 4 Ogos ini.



Matlamat utama AFLES 2015 adalah untuk menjalinkan rangkaian pelajar universiti ASEAN yang memiliki potensi baik untuk menjadi pemimpin masa depan dalam usaha memperkayakan kepimpinan mereka melalui aktiviti-aktiviti seperti ceramah, forum, sesi perkongsian oleh pemimpin yang berjaya, projek khidmat masyarakat dan sesi pertukaran budaya.

Yang turut hadir dalam majlis perasmian ialah Pengarah Pejabat Antarabangsa USM Profesor Madya Dr. Anees Janee Ali; Pengarah Shelton International College and RPT Singapore, Patrick Hogan; Pengarah Projek AFLES 2015 Imran Sarwar; dan pegawai-pegawai utama USM.

Teks: Tan Ewe Hoe/Foto: Mohd Fairus Md. Isa



Share This

Pusat Media dan Perhubungan Awam / Media and Public Relations Centre

Level 1, Building E42, Chancellory II, Universiti Sains Malaysia, 11800 USM, Pulau Pinang Malaysia

Tel : +604-653 3888 | Fax : +604-658 9666 | Email : pro@usm.my (<mailto:pro@usm.my>)

Laman Web Rasmi / Official Website : [Universiti Sains Malaysia \(http://www.usm.my\)](http://www.usm.my)

[Client Feedback / Comments \(http://web.usm.my/smbp/maklumbalas.asp\)](http://web.usm.my/smbp/maklumbalas.asp) | USM News Portal. Hakcipta Terpelihara USM 2015